

**Meeqqanut tapiissutit pillugit Namminersorlutik Oqartussat nalunaarutaat nr. xx, xx.  
december 2009-imeersoq.**

Meeqqanut tapiissutit pillugit Inatsisartut inatsisaat nr. xx, xx qaammat 2009-imeersumi § 4, imm. 3, § 6, imm. 5 aamma § 10, imm. 2 malillugit aalajangersarneqarput:

**Kapitali 1.**

*Isertitarineqartussat naatsorsuutigineqartut tunngavigalugit meeqqanut tapiissutit tunniunneqartarnerannut piumasaqaatit.*

**§ 1.** Isertitarineqartussat naatsorsuutigisat ukiumut tapiiffiusussamut tamarmiusumut imaluunniit ukiumut tapiiffiusussap sinnerata ilaanut naatsorsorneqartarput. Meeqqanut tapiissutit tunniunneqartarnerannut inuup imaluunniit inuit isertitaat tunngavigineqartussat naatsorsuinermit isertitassat naatsorsuutigineqartut tamarmik ilanngunneqartarput, ukiumi tapiiffiusumi akileraarutitigut inuit ilanngaattissat naatsorsuutigisat ilanngaattigalugit, tak. meeqqanut tapiissutit pillugit inatsimmi § 4.

*Imm. 2.* Isertitassat akileraaruserneqartussat naatsorsorneranni aapparisaq isertitai ilaatinneqassapput aappariilluni inooqatigiinneq sivikinnerpaamik ukiumik ataatsimik sivilissuseqarsimappat.

*Imm. 3.* Meeqqanut tapiissutit ukiumoortumik aalajangersarnerannut imaluunniit allatut naatsorsornerannut pingaaruteqartunik uppersarsaatinik paasissutissanillu ilaatigut qarasaasiakkoortumik kommunalbestyrelsi piumasaqarsinnaavoq, taakkua ilagalugit isertitat atuuttut annertussusaannut, akileraarutitigut ilanngaattissat naatsorsuutigisat annertussusaannut imaluunniit isertitat ilaasa atorunnaarnerinut uppersarsaatit.

**§ 2.** Ukiumi tapiiffiusussami imaluunniit ukiup tapiiffiusussap sinnerata ilaani isertitassat A-tut naatsorsuutigineqartut naatsorsorneranni A-tut isertitarineqartut tamaasa tunngavigalugit isertitassat naatsorsorneqassapput, ukiumut ilivitsumut isertitanngorlugit.

*Imm. 2.* Ukiumi tapiiffiusussami imaluunniit ukiup tapiiffiusussap sinnerata ilaani isertitassat B-tut naatsorsuutigineqartut naatsorsorneranni ukiumi isertitaqarfiusumi kingullermi ilisimaneqartumi B-tut isertitat tunngavigineqassapput, inuup B-tut isertitaqartuusimasup uppersarsinnaappagu isertitaasut nammineq inuussutissarsiteqarnermit tunngaveqartuusut, § 3 imm. 1-imi pissutsit taaneqartut arlaata malitsigisaanik atorunnaarsimasut, annertuumik ikilisimasut imaluunniit allangorsimasut.

**Kapitali 2.**

*Isertitassat annertuumik imaluunniit ataavartumik ikilinissaat allangornissaalluunniit naatsorsuutigineqartillugu meeqqanut tapiissutit tunniunneqartarnerannut piumasaqaatit.*

**§ 3.** Isertitat meeqqanut tapiissutit tunniunneqarnerannut tunngaviusimasut annertuumik ataavartumilluunniit ikilinissaat naatsorsuutigineqarpat meeqqanut tapiissutit ukiup ingerlanerani naatsorsoqqinneqarsinnaapput. Isertitat annertuumik ataavartumilluunniit ikilisimasarput:

1) isertitat tunniussinermit tamakkiisumik ilaannakuusumilluunniit tunngavigineqarsimasut toqukkat qimaguttoqarnerup, averusernerup, avinnerup katissimanngitsulluunniit

uppernarsagaasumik aappariikkunnaarnerup kingunerisaanik naatsorsuinermi ilanngunneqartassanngillat,

2) inuk, isertitai meeqqanut tapiissutit tunniunneqarneranni tunngavigineqarsimasut, tapiiffigineqarsinnaasumik ilinniagaqalerpat imaluunniit qaammatinik arfinilinnik sivisunerusumik pikkorissalersimappat imaluunniit

3) inuk, isertitai meeqqanut tapiissutit tunniunneqarneranni tunngavigineqarsimasut, pisortaniit pensionisiaqalersimappat, imaluunniit nappaammik, innarluuteqarnermik imaluunniit suliffissaaleqineq pissutigalugu ataavartumik sulisinnaajunnaarnini uppernarsarsinnaappagu.

*Imm. 2.* Sivikitsumik qaangiutilertortumik suliffissaaleqinerup imaluunniit napparsimanerup kingunerisaanik isertitat ikilineri annertuumik ataavartumilluunniit isertitat ikilinerisut isigineqanngillat. Sivikitsumik qaangiutilertortumik suliffissaaleqineq imaluunniit napparsimaneq isumaqarpoq piffissaq sapaatit akunneri sisamat aamma ikiorsiissutinut allanut ikaarsaarnissaq sioqqullugu.

*Imm. 3.* Pissutsit allanngornerinik paasissutissat kommunalbestylresimit tiguneqareernerisa kingorna qaammatip aallaqqaataani atuutilersumik meeqqanut tapiissutit naatsorsoqqinneqassapput. Allanngortoqarneranik paasissutissat, imm.1 naapertorlugu meeqqanut tapiissutit qaffanneqarnerinik kinguneqartussat allannguinnissamut piffissaliussamit kingusinnerusumik kommunalbestyrelsimit tiguneqarpata, allannguinnissamut piffissaliussamiit kingumoortumik atuutilersumik meeqqanut tapiissutit naatsorsoqqinneqassapput, tamanna tapiissutisisussap nammineq kukkunerisimannippagu.

### **Kapitali 3.**

*Meeqqanut tapiissutit siumoortumik tunniunneqartarneri il.il kiisalu pilersuisussap inissisimaneramik kommunip nalilersuinera.*

§ 4. Meeraq angajoqqaanngippat, meeraq pisortanit pilersorneqartussatut isigineqassaaq, taamaalilluni meeqqanut tapiissutinik naatsorsuisoqarsinnaanngilaq tak.inatsimmi § 1, imm.1, nr. 4.

§ 5. Meeqqanut tapiissutit qanoq tunniunneqassanersut kommunalbestyrelsimit aalajangiiffigineqassaaq, aningaaserivimmilu assigisaaniluunniit kontomut tapiissutit ilisiffiusussamut tapiissutisisussap paasissutisiinissaa pumasarisinnaallugu.

§ 6. Meeqqanut tapiissutinik inatsimmi § 5-imi malittarisassat malillugit tunniussineq meeqqamut iluaqutaanngitsoq uppernarsarneqarsinnaappat, meeqqanut tapiissutit pisortanit aqunneqarnissaat, imaluunniit tapiissutit ilai nioqqutissiannorlugit tunniunneqartarnissaat kommunalbestyrelsimit aalajangerneqarsinnaavoq. Aningaasartuutit suut tapiissutinut matussuserneqassanersut takussutissiortoqassaaq. Nioqqutissanik pisisinnaanermut uppernarsaat atonerullugu tunniussisoqartassaaq. Aningaasat amerlanngitsut, naafferarlugit, tapiissutinik tigusinnaatitaasumut aningaasannorlugit tunniunneqartarsinnaapput.

*Imm. 2.* Meeraq 15-it sinnerlugit ukioqarpat meeqqamut skolehjemmimi assigisaaniluunniit najugaqartumut meeqqanut tapiissutit ilai toqqaannartumik tunniunneqarsinnaasut kommunalbestyrelsi aamma aalajangersinnaavoq. Meeqqap atisassarsiuutissaanut kaasarfimmiusaanullu meeqqamut toqqaannartumik aningaasannorlugit taamaallaat tunniussisoqarsinnaavoq.

*Imm. 3.* Imm. 2 naapertorlugu meeqqamut tapiissutit ilai meeqqamut tunniunneqarnissaat kommunalbestyrelsimit aalajangerneqarpat meeqqap pilersorneqarneranut aningaasartuutinut sunut

tapiissutit matussutaassanersut aningaasallu qanoq annertutigissanersut ataatsimut takussutissiortoqassaaq. Meeqqanut tapiissutit sinneri pisortanit aqunneqassasut kommunalbestyrelsi aamma aalajangersinnaavoq.

*Imm. 4.* Imm. 1-2-mi aningaasartuutitut takussutissiat taaneqartut meeqqanut tapiissutisiaqarnissamik pisinnaatitaasoq sapinngisamik suleqatigalugu suliarineqassapput.

**§ 7.** Meeqqanut tapiissutit siullermeertumik tunniunneqannginneranni tapiissutinik pisartagaqarnermi piumasaqaatit pillugit pisartagaqartussaq ilisimatinneqassaaq. Pisartagaqartoq kommunimut allamut nuuppat, imaluunniit tapiissutit tunniunneqartarnerinut sunnuteqarsinnaasunik pissutsinik allanngortoqassappat kommunalbestyrelsip ilisimatinneqarnissaa pillugu pisartagaqartoq aamma ilisimatinneqassaaq. Paasissutissat tunniunneqartut eqqortuuneri pillugit qinnuteqartoq ilumoorluinnarluni nalunaaruteqarnini atsiussavaa.

*Imm. 2.* Meeqqanut tapiissutit tunniunneqartarnerat malillugu, meeqqanut tapiissutinik pisartagaqarsinnaasoq kommunimut allamut nuuppat kommunalbestyrelsip kommuni nuuffigisaa ilisimatissavaa.

Kommuni najorunnaarneqartoq ilutigitillugu aningaasanik tunniussisarneq ingerlaannarsinnaaqullugu suliap takussutissartai kommunimut nuuffigisamut nutaamut nassiutissivai. Ilanngullugu ilisimatissutiginneqassaaq piffissaq kingullermik aningaasanik tunniussiffiusimasoq. Nuunnermut atatillugu qinnuteqartoqarnissaa piumasaqaataangilaq, kisianni kommunip nuuffigineqartup qulakkiissavaa pisartaqagarnissamut piumasaqaataasut suli naammassineqarsimanersut.

**§ 8.** Ukiumoortumik Meeqqanut tapiissutinik tunniunneqartartussanik naatsorsuineri, meeqqanut tapiissutit tunniunneqartarnerisa ingerlaannarnissaannut pingaaruteqartunik pissutsit allanngorneri pillugit ilisimatissusaaqarnissamik kommunalbestyrelsi tapiissutisartumut paasitissisaaq.

*Imm. 2.* Tamatuma kingorna tunniussineq siulleq sioqqullugu paasissutissat tunngavigalugit meeqqanut tapiissutit tunniunneqartassapput, meeqqanut tapiissutit allanngornerinik imaluunniit atorunnaarnerinik kinguneqartumik allanngortoqarnera pillugu paasissutissanik kommunalbestyrelsip tigusaqarnissaata tungaanut.

**§ 9.** Qinnuteqartoq imaluunniit meeqqanut tapiissutinik pisartagaqartoq tamatumunnga piumasaqaatinik naammassisaqannginneranik ilimagineqarnera kommunimit paasineqarpat, kommunip isumaanik allannguisinnaasunik aalajangersimasunik pineqartup uppernarsaanissaa kommunimit piumasarineqassaaq.

#### **Kapitali 4.**

*Tapiissutit amerlavallaartut tunniunneqarsimasut utertinneqarneri kiisalu nakkutilliineq.*

**§ 10.** Isertitanut killiliussat Aningaasanut Inatsit malillugu aaliangersarneqartassapput kingullermillu iluarsisooqarpoq 2009-mi.

**§ 11.** Meeqqanut tapiissutinik kommunip naatsorsuinerani atorneqartussanik paasissutissanik nipangiussinerit, piaaraluni eqqunngitsunik salloqittaarilluniluunniit paasissutissiinerit allatigulluunniit paasissutissanik piaaraluni tunniussinngitsoornermi kommuni nalilersuissaaq tamanna pillugu politiiunut unnerluussisoqassanersoq.

**Kapitali 5.**  
*Atortuulersitsineq*

§ 12. Nalunaarut una ulloq xx.xx 2010-mi atortuulersinneqarpoq.

*Imm. 2.* Peqatigitillugu meeqqanut tapiissutit pillugit Namminersornerullutik Oqartussat nalunaarutaat nr. 38, 19. december 1995-imeersoq atorunnaarsinneqarpoq.

*Kalaallit Nunaanni Namminersorlutik Oqartussat, ulloq xx. december 2010*

Maliina Abelsen

/

Konny Olesen